

Ontmoeting 1

Die Rigters

In hierdie ontmoeting kry kinders die geleentheid om van die verskillende rigters te leer en hoe God hulle gebruik het.

Teks: Rigters 3:7–15a en 4:1–4

Hulpmiddels:

- Die name van die rigters afsonderlik op stroke karton
- Afdrukke van “6 Momente” vir elke kind
- Name van die rigters in ’n bakkie
- Afdrukke van die “wiel”
- Sandboks
- Marie-koekies en malvalekkers
- Mikrogolfoond



Welkom

Volg hierdie eenvoudige ses-stap-resep om vir die kinders malvalekker-lekkernye te maak:

1. Neem ’n Marie-koekie.
2. Plaas ’n malvalekker daarop.
3. Plaas dit in ’n mikrogolf vir 3 sekondes (toets voor die tyd om te voorkom dat dit te pap raak).
4. Haal dit vinnig uit (Pasop, dis warm!)
5. Neem nog ’n Marie-koekie en druk dit bo-op die sagte malvalekker.
6. Laat die lekkerny afkoel.

Maak nou nog ’n lekkerny, maar maak die volgorde deurmekaar:

1. Neem die Marie-koekie.
2. Plaas dit in die mikrogolf vir 3 sekondes.
3. Haal dit vinnig uit.
4. Plaas ’n malvalekker daarop.
5. Neem nog ’n Marie-koekie en druk dit op die sagte malvalekker.
6. Laat die lekkerny afkoel.

Wys nou vir die kinders dat dit misluk het.

Vandag gaan ons leer dat die volk van God oor en oor dieselfde foute gemaak het. Amper soos om ’n verkeerde resep oor en oor te gebruik.



Wyding

Stilword-ritueel uit Psalm 23: Laat die kinders kruisbeen sit en hulle oë toemaak. Herhaal 3 keer: “Die Here is by ons.” Sê nou hardop: “Omdat die Here my Herder is, is ek nie bang nie. Hy lei my deur die donker tye en Hy versorg my.”



Woord

Lees Rigters 3:7-15a en 4:1-4

Die boek Rigters vertel van die tyd toe die Israeliete die Beloofde Land binnegegaan het. Daar was nog nie h koning vir die volk aangestel nie en hulle is deur rigters gelei. Die rigters was oorlogsleiers en hulle moes ook uitsprake lewer in die hof. Dis waar ons woord “regters” vandaan kom.

Die verhale van die rigters klink baie soos ’n resep of patroon wat oor en oor afspeel.

1. Israel leef toegewyd aan God.
2. Israel raak ontrou aan die Here en dien afgode.
3. Die Here straf hulle deur hulle oor te gee in die mag van hulle vyande.
4. Hulle roep om hulp by die Here.
5. Die Here gee ’n rigter.
6. Die rigter red hulle uit die mag van die vyande.

Dit het 12 keer gebeur! Die name van die rigters wat die Here gestuur het, was: Otniël, Ehud, Samgar, Debora, Gideon, Tola, Jaïr, Jefta, Ibsan, Elon, Abdon en Simson.

(Doen die volgende om h ervaring te skep van wat dit beteken om 12 keer dieselfde fout te maak. Roep h kind vorentoe en klap hom liggies op sy/haar skouer en sê: “Jammer, ek sal dit nie weer doen nie.” Herhaal dit 11 keer.)

Vra vir die kinders hoe hulle voel oor wat jy gedoen het. Het hulle gevoel dat jy altyd opreg jammer was, of het hulle gevoel jy bedoel dit nie meer nie?

Dink hulle dat jy elke keer vergewe moet word?

Dis wat in die boek Rigters gebeur het. Die Israeliete was 12 keer ontrou aan die Here.

Roep 12 kinders na vore en gee aan elkeen een van die 12 rigters se name.

Lees saam met die kinders die name. Die meeste van die name klink vir ons vreemd!

Laat die kinders nou in die volgorde staan soos die rigters in die Bybel verskyn het. Leer die volgorde van die name vir die kinders. Daag hulle uit om die volgorde te onthou. Die 12 kinders wat die name vashou, ruil nou die name om sodat die name deurmekaar is. Kyk wie kan hulle nou in die regte volgorde laat staan. Hulle mag die Bybel as hulpmiddel gebruik. Soek die name in die boek Rigters. Jy sou ’n kompetisie hiervan kon maak deur die groep in twee te deel.

Kinders kry tyd om oor die verhaal te dink:

1. Ek wonder of jy iemand ken wat oor en oor iets doen wat verkeerd is..
2. Ek wonder of die Here mense altyd sal vergewe.



Werskaf

- Plaas al die name van die rigters in ’n bakkie en laat die kinders die name in die regte volgorde rangskik.
- Gee vir elke kind die ses gebeure wat soos ’n patroon oor en oor herhaal het. Laat hulle dit opknip en skommel en in die regte volgorde plak.
- Gee vir die kinders afdrukke van die wiel. Laat hulle die ontbrekende woorde invul. (h Voltooide, kleiner sirkel word ingesluit vir kontrole.)

- Die groter kinders kan die ses goed met hulle vingers in die sand van 'n sandbak skryf. Laat hulle dit dan weer platvee om die vergifnis van die Here te demonstreer.

Sluit af met die seënbede

“Die Here kies jou om mense wat swaarkry, te gaan help, maak nie saak wie jy is nie. Gaan nou, moenie bang wees nie. Die Here is met jou.”

Otniël

Ehud

Samgar

Debora

Gideon

Tola

Jaïr

Jefta

Ibsan

Elon

Abdon

Simson

Israel leef toegewyd aan God.

Israel raak ontrou aan die Here en dien afgode.

Die Here straf hulle deur hulle oor te gee in die mag van hulle vyande.

Hulle roep om hulp by die Here.

Die Here gee 'n rigter.

Die rigter red hulle uit die mag van die vyande.

